

INUIT ATAQATIGIIT

Inatsisartuni



FM 2017/115

11.05.2017

Hans Aronen

**Aalisarneq pillugu Inatsisartut Inatsisaat allanngorteqquillugu imaalillugu Kalaallit
Nunaata kitaani raajanut TAC –ip agguanneqarnerani sinerissap qanittuani
alisartunut avataasiortunullu assigiimmik 50/50-ngortillugu suliareqquillugu
Naalakkersuisut peqquneqarnissaannik Inatsisartut aalajangiiffigisassatut
siunnersuut.**

(Inatsisartunut ilaasortaq Nikolaj Jeremiassen, Siumut)

Aalisarneq pineqartillugu inatsisit peqqussutit nalunaarutillu tamatigut allanngooqattaangitsumik, aalisarnermillu ingerlatsinermi suut tamaasa naatsorsuutingalugit pivusorsiortumik minnerunngitsumillu pitsasumik misissuillarsimalluni paaseqatigiiffiusumillu suliarineqartarnissaat Inuit Ataqatigiinnik pingaartittuaannarsimavarput.

Ullumikkut siunissamilu aalisarneq nunatta aningaasarsiorneranut pingaaruteqarluinnartoq ilisimavarput, taamaakkaluartorli eqqaamassavarput aalisarneq nunatsinnut, inuiaqatigiinnullu tamanut, sutigut tamatigut sunniutigisinnaasai pitsaanerpaamik kinguneqartussanngorlugit aamma suliassaammata.

Nunaqarpugut sineriarujussualimmi inuiaallu 56.000-it siaruarsimalluta najugaqarfigisatsinni, tamannalu immini nukiavoq pingaaruteqarluinnartoq. Sihamasissumimmi najugaqartariaqarnerput pingaartilluinnarlugu aaqqissuussinerit suullunniit eqqarsaatingalugit pisussaaffigiinnarpalput.

Pisuussutsit uumassusillit inuiaqatigiit ataatsimoorullugit pigisatta inuiaqatigiinnut siamarlugit iluaqtigineqarnissaat aatsaat taama pingaartigilerpoq. Ukiuummi makkua atorpagut nunatta namminilivinnissaanut siunissamullu sutigut tamatigut nukitorsarluta piareersarnitsinnut.

Inuit Ataqatigiinnik sinerissap qanittuani avataanilu raajarniarnermi pisassat akornanni 50/50 aggualluni inissinnissaq immini ajoriffissaqartinngilarput tapersorsornartillugulu, taamatullu aaqqiinerup peqatigisariaqangai peqataatillugit aaqqissuussinissaq pingaarluinnartutut isigaarput.

Qaffaanissarlu iluatsinneqartariaqartoq Inuit Ataqatigiinnik isumaqarpugut. Iluatsissappammi raajartassanik piginnittuunerup nalilersortariaqarnerattaaq pingaarluinnartutut matunani isigineqartariaqarpoq.

Apeqquilli makku siunnersummut attuumassuteqartillugit akissutissaqartinnejaleereersimanissaat neriuutingalugu saqqummiutissavagut.

Raajanut TAC-p agguarneqartarerani 40/60-miik 43/57-mut allanngortinneratigut sinerissap qanittuani minnerussuteqarlutik pisassakinnerullutilu raajarniartuusunut iluaquaangaarsimanngitsoq paasillugu, maanna qaffaasariaqalerneq minnerussuteqarlutik pisassakinnernut sutigut sunniuteqarluarnissaa paaserusunnarpoq.

INUIT ATAQATIGIIT

Inatsisartuni



Aalisartutut minnerussuteqarlutik ikinnerusunik raajartassaatilinnut ukiorlu qiteqqutiinnartoq nunguutsinertik pissutingalugu aalisartitseqatigiffinnut anginernut pisassanik pisiniartartunut, ukioq ilivitsumut pisassaqarnissamik qulakkeerinnissanersoq sukumiisumik qulaajarneqartariaqarpoq. Isumaqaqattami piffissanngortoq minnerullutik pisassakinnerpaajullutik sinerissami siammarlutik raajarniartuusunut maanngaanniik nukittorsaanissaq.

Avataasiorlutik aalisartitsiveqatigiinniik sinerissap qanittuani pisassanut akuusoqarnersoq taamaattoqarpallu qanoq annertutigisumik akuuffigineqarpat, illuanuli, sinerissap qanittuani aalisartut aamma taamatut avataasiutilinnut pisassaannullu akulerusimasoqarpa?

Sinerissap qanitaani avataasiorlunilu raajartassanik ataasiakkaatut ataatsimut pigisaqarneq pisimappat annertusiartorpallu, inuaqatigiinnut siammasissumik najugaqariuseqartunut suut tamaasa eqqarsaatingalugit qanoq sunniuteqassava.

Ullumikkut sinerissap qanittuani raajarniat pisassakinnerullutik minnerusunut ukioq kaajallallugu pisassaqalernissaq qanoq annertuseriaataassava?

Oqareernittut 50/50-mik agguaanissaq taperseraluarlutigu, Nalakkersuisullu akissutitaanni ukiamut aalisarnermut inatsit nutaassamut siunnersuutip ilanngullugu suliarineqarnissaanik kaammattuinerat soqtiginartorujussuartut isingaarput. Taamaattumik ataatsimiititaliaq susassaqartoq piffissarluarluni siunnersummik suliaqarnissaa inassutigerusunnarpoq.

Taamatut oqaaseqarluta Aalisarnermut Piniarnermut Nunalerinermullu ataatsimiititaliamut apeqqutinik akissutissarsiniarnissaq suliakkiullugu ingerlateqqipparput